

江都縣志卷之十九

試江南揚州府江都縣知縣臣陸朝璣奉

旨編輯

藝文志後

傳

廣陵先生傳

宋劉發

王氏舊望太原自先生之七世祖居於魏之元城不知其始何遷也叔祖父乙居廣陵先生幼育於乙故遂爲廣陵人年十數歲晝從羣兒嬉夜獨誦書往往達旦不眠率以是爲常未嘗從師爲辭章卽雄偉老成人見之

江都縣志

卷十九 藝文志

一

皆驚年稍長倜儻不羈束周鄉里之急爲不義者面加毀折無所避人皆畏而服之里人滿執中謹厚人也一日先生過之執中以先生所爲爲非是先生因自悔更閉門讀書久之所得益以閱深乃爲竹賦以自廣其姊寡居貧無以自存乃聚徒天長已而積薪之中得芝一葉先生有感焉乃著藏芝賦是時丞相荆國公赴召道由淮南先生賦南山之田詩往見之公得先生大喜期其材可與共功業於天下因妻以其夫人之女弟焉旣而徙高郵太守邵公必延請主學先生辭不獲已強應之尋亦辭去邵公爲部使者以其節行聞於朝廷不報

先生既喜退隱思江南山水之勝乃遷居潤賦江上  
中之詞居頃之熟於潤之山川道里又著遊山記以萬  
其意居無何以江陰幽僻乃去潤遷江陰江陰地下濕  
得疾苦足弱因復遷常未幾以足疾終天下士大夫無  
識不識皆痛惜之荆國公爲誌其墓荆國公既誌其墓  
又哀思之著於詩多至十數篇先生德業之敏如駕四  
馬馭夸路駸駸驟馳雖健步者邈不可及然聞一善言  
見一善行未嘗不歎慕自以爲不逮事寡姊如事父教  
姊之孤兒不啻己子歲時祭祀於其考妣必流涕親識  
饋遺纖介無所受諸生有獻度其家貧禮雖甚勒不取

也平生爲文多操紙立書未嘗有藁或有藁隨輒焚毀  
故其終家無遺文先生方生管城君名之曰令兒未及  
更立名而管城君卒故先生因名令初字鍾美建安黃  
莘以其造道之深字之曰逢原吳氏從先生一年而寡  
歸治田桑布素以待盡其趨操論議是皆宜爲先生配  
先生既終方得女荆國公爲擇所宜歸歸吳人吳師禮  
亦名士嗚呼道之不明於世久矣惟道之不明故士於  
出處皆莫知其所宜守仕於朝廷者知進而巳時不足  
以有爲雖或援而去之猶不能自止也不然則溺厚  
利苟徇世俗以自私無足道也隱於山林者知退而已

時若可以有爲雖或援而出之猶不能自屈也不然則喜於名高苟違世俗以自顯無足取也夫天下有道以道狗身天下無道以身狗道古之君子無必出也無必處也顧道何如耳苟外於道而拘於出處之迹宜其無自而可也方先王之盛時所以造士者有術優游崇養成共自得之實而不使 累於外物故士多見夫道之大全而進止行遁無所於逆三代而後世不知所以造士士未明所以行已而紛紛外物既已變易其思慮矣則其所守無所適當固其所也嗚呼若先生者可謂豪傑之士矣去三代之久如此而以宏材敏識偉節高行特立於一時使其無不幸之死而幸與世偶則其所設施當何如哉雖然以大王王季文王武王成就天下之士至於易商爲周而士之備道德之美者宜不可勝數矣管蔡一以流言而朝廷上下遂皆信之知保周公而賊四國者才十夫而已然則士之不待文王而興者豈特罕聞於後世哉雖先生之世固已然矣推此則若先生者其可易得哉世之知先生者或以其文或以其行未爲知先生者也知先生者唯荆國公而世或疑之故詳先生之行事而論次之如此

陳偕傳

秦 觀

偕姓陳氏淮南廣陵人家故饒財而偕與其弟獨喜學畫其後技日以進家日以微遂以爲業士大夫既喜其畫且愛其爲人徃徃稱之然非偕之好也其言曰予從事於茲有年矣凡古今之畫不見則已苟有見焉雖敝縑裂素之餘未嘗不學一不可於意輒復易之舐筆濡墨欣然忘勞蓋是時余方以畫爲事固其勢不得不然乃今思之亦良苦矣且物之有形如浮埃聚沫來無所從去無所詣興一債於無窮之中而我方汨汨然隨而畫之可不惑歟彼好事者又從而玩之至藏於巾笥且不欲以數閱可不謂大惑者歟嘻今老矣顧家貧無

以給衣食之奉聊復俛仰於其間至於得失精粗不復經意也又曰有學於余者衆矣余將教之必使縱心之所勤肆筆之所成以觀其天蓋工而不雅者有矣疎而不俗者有矣詳略得宜意氣容與卓乎遂若無與及者亦或有焉余從而告之曰共後當然其後當然已而果然夫畫固技之微者也其猶若是又况有貴於畫者哉其子直躬亦世其學而所言尤異嘗曰昔宋元君時畫圖有一史解衣槃礴元君曰是真畫者也夫解衣槃礴固儻之所得閒暇之所好也元君乃以爲真畫果安在乎有得於此然後可以言畫而或說以謂神定

意閑固以異於他史其亦失元君之意矣余聞而異之  
又從而思之豈所謂自得於己者耶抑亦得於人者耶  
將內雖不克其言而頗亦有志於是耶人固未易知然  
比夫銜技以夸人賈能以售汙俗者相去亦遠矣古之  
君子聞一言中於理必書之故漁人之所賦孺子之所  
歌皆得載於前史矧其有合於道德之要者乎於是爲  
傳其言以遺同好亦時觀之以自擇焉

贈太僕少卿郝公傳

國朝王巖築夫  
寶應

郝公景春字和滿揚州江都人也慕楊忠愍爲人每讀  
其年譜輒太息生平數窮困或曰子困固當胡不學今

江都縣志

卷十九 藝文志

五

之術乎公曰今有術耶吾乃今矣因別號乃今旣歎曰  
吾終不善今也又更自古因圓其冠前角而後方之間  
居偶發篋忽泣數行下其子驚問故則手泰昌錢拭淚  
曰見此憶聖天子也公以萬曆壬子舉人仕鹽城教諭  
改陝西苑馬寺錄事遷黃州府照磨陞房縣知縣時流  
賊張獻忠熾甚所過城郭屠滅一空入湖廣與羣盜蹂  
躪諸府縣鄖襄間聚九營而羅汝才白貴黑雲祥者三  
營逼處房地房城高丈餘被兵數載且在萬山中轉饜  
無所公之房次子鳴鸞請從公至則修城壕築敵臺招  
流移諸守禦具備當是時總理軍務都御史熊文燦奉

命討賊不辦遂主招撫獻忠乃就撫文燦請於朝授副  
總兵居之穀城所謂西營八大王者也文燦使監軍僉  
事張大經監其軍而汝才雲祥暨貴皆陽言乞撫逼房  
踞郊關公告急文燦不問然公志在戰守不欲撫文燦  
嫉之檄謂今朝廷欲化賊爲民奈何驅民爲賊乎賊聞  
之喜遂沿城屠掠公擊殺數百人賊懼訴文燦文燦  
謂公壞撫事趣公駐賊城外使指揮數人至房安插指  
揮受賂賂惟所欲房人驚譁哭訴搏指揮公力解乃止  
既三賊逼城下自東至北爲汝才壁號曹操營自西至  
南爲雲祥壁號整十萬營而貴壁則分列城西北及西

南號小秦王營凡衝要地盡安塘置馬焉公不得已單  
騎抵賊壁約盟因明約束畫疆界乃定已而歎曰吾數  
奇不可逃也夜半篝燈自著數奇紀畧公夙慕忠愍此  
既自著年譜意云未幾獻忠叛穀城知縣阮之鈿死之  
大經從賊爲前驅引兵圍房汝才等絕其糧割田中麥  
助賊時城中僅羸兵二百公以寸紙繫卒髀間爲丐狀  
縋城求援於文燦凡十四往不報獻忠遺公書要以讓  
城公怒曰郝老頭可斫城不可讓也賊因急攻公與鳴  
鸞乘城施大小砲石身自指揮賊布雲梯以登公用鉤  
奪其梯數十不得上自下掘城公爇沸油傾之死者近

千人賊乃掘墳毀棺出尸取版蔽以掘城公用火燒之兼擊大石死者數百人獻忠恚甚益兵圍數十重且執刀乘馬繞城走視攻不力者殺之公置錢城上指曰擊中一賊賞千錢兵民益奮須臾錢盡又斃賊數十百人鳴鸞亦手擊數人相持五晝夜賊氣奪撤圍將宵遁忽汝才至城下周麾大呼曰城破矣則守北門指揮張三錫知援絕以繩縋賊相引而登故也城既陷守將楊道選率兵巷戰死之監軍僉事從賊張大經紅纓大帽持短槍乘白馬先入索公獻忠繼至入坐縣署賊兵擁公至起階迎奉卮酒飲公公叱之忽數十人持令旗馳

至曰曹營令我等來救郝知縣擁公上馬去時鳴鸞從亂軍失散往來求公不得而僕陳宜散髮跣足從亂軍求公遇之至曹營公曰誰爲求吾兒來汝才使一卒執旗去徧求之鳴鸞不得公哭於道久之遇執旗卒會夜大雨如注鸞奔至見公哭公曰男兒至此只要自己決斷耳以手自畫頸曰此亦不甚痛也鳴鸞收淚慷慨曰兒所苦父子死不相見旣見敢不死觀者皆泣汝才說公降不應大經以監軍從賊欲得公分其惡故與獻忠謀使汝才說公有頃獻忠使卒來索公命鳴鸞且留遂往陳宜隨之至則獻忠大經並坐獻忠問庫銀倉米安

在聲甚厲公叱曰死賊倉庫有物城豈爲汝陷乎賊怒殺典史以懼公公不動大經起前勸曰事已至此須識時公大罵曰汝受朝廷厚恩官監軍負國辱親甘從死賊我死必活捉汝獻忠大怒使卒擁公出公口不絕罵至西河邊鳴鸞痛哭追至公呼好者再遂遇害鳴鸞大呼曰死賊何不併殺我遂與宜俱遇害主簿朱邦聞罵賊不肯屈一門皆死皆崇徵十二年五月二十九日也事聞部擬贈尚寶寺卿天子嘉公忠改贈太僕寺少卿廕一子入監特祠祀鳴鸞陳宜祀公旁

王巖曰予聞冷水道人者不知何許人常出入諸督撫幕中叅其謀畧又能得賊陰事豫以告且於凶吉皆先知終曰惟飲冷水窮冬亦然公死道人白其事圖上請贈廕矢一日不死必辦此然於公無半面識也嗚呼世之平居稱相知而毛髮利害反而如不相識者聞道人之風亦少知愧哉

江都知縣周公傳

汪懋麟

公周氏諱志畏字抑畏又字雪松寧波鄞縣人曾祖炯封文林郎祖天覺故明萬曆己卯舉人鄧州知州父乃祚寧波府學生員贈江都知縣母李氏贈太孺人某府知府李公應辰女初孕公時夢神告以月望當生兒及



生果及望因小字望公負至性少讀書見古人忠孝節義事卽感激奮發日夜磨礪思發舒其所欲爲事父母孝母早得疾卧牀十餘年公視藥卧側不敢離間潛誦書以慰其父夜不敢解衣寢中裙廁踰日取浣濯不假妻子手久無倦容母亡一年父尋歿朝夕哭毀瘠過哀及塋不輟哭遇風雨卽麻衣趨伏墓上慟哭霽始返自傷爲諸生未得志養其親常書蓼莪篇自責且詠且哭聞者哀之服除崇徵壬午舉於鄉明年癸未成進士又明年甲申流賊李自成陷京師謁選南京得江都當是時帥分部四鎮國家莫能制所至奴官吏蹂百姓稍

不當橫刀怒視揚州一鎮尤酷惡吏民苦之帥旋死兵無所統益橫暴公適下車將弁氣凌公公強項抗不撓取其兵害民者置以法兵大譟謀劫公廷論多公直恐不免議調歙縣大學士史公可法督師駐揚州知公才欲倚爲佐聞調慰留之曰敵且至城孤立無救度不能守民旦夕死我與子俱死民所以不卽死者恃我與子在耳子卽去如民何公素子畜民民依戀卒不忍去城中餉匱公往高郵區畫糧數千斛入城爲堅守計未幾大兵薄城下史公守西門公守小東門躬率士卒被介冑嚴刁斗宿敵樓上夜不交睫攻益急有給公降者

索縣印公罵之曰城破吾抱印死印不可得西門破史公死兵入執公不屈擁至南郭福緣庵刃公於水公平時當以小鏡置懷中用以爲鑑至是死數日無知者一僕行覓公見尸水上識其衣啟視鏡宛在乃哭殮焉公生於萬曆丙辰四月十七日死於乙酉四月二十五日娶袁氏一子斯言比聞公死泣不止歿於江都尼庵甫八歲公兄子斯盛字屺公

皇清順治辛丑進士以文章名於時哀公死之久而未彰也屬余爲之傳

論曰乙酉之難史公死城守顯白昭著矣乃以葬不得

尸人迄今疑之甚矣小人之不可語大義也嚮使周公之尸不出其疑又孰能辯哉周君屺公不死其叔以弟斯戩繼公後又表彰之嗚呼賢矣

碑銘

追崇揚王神道碑銘

明 宋

濂 景濂 金華

皇帝恭膺大寶式展孝思既追崇祖宗四代帝號建立太廟復念皇太后之所自出追封外王父爲揚王外王母爲揚王夫人建祠於太廟之東歲時遣重臣致祭近有來自淮陰者言王墓在盱眙如故上聞之悲喜

卽詔內臣及圓陞署令徃祭而修治之置灑掃之戶凡

三護視瑩域且命詞臣撰文以樹諸神道臣濂伏讀御製王之行若曰王姓陳氏世爲維揚人不知其諱當宋之季名隸尺籍伍符中從大將張世傑扈從祥興帝駐南海至元巳卯春世傑與元兵戰師大潰士卒多溺死王舟亦爲風所破幸脫死達岸與一二同行者累石支破釜煮遺糧以療饑已而糧絕計無所出同行者曰我等自分必死聞髑髏山有死馬共烹食之 死亦得爲飽鬼不識可乎王未及行疲極輒晝睡夢一白衣人來謂王曰汝慎勿食馬肉今夜有舟來共載也王以爲偶然未之深信俄又夢如初至夜將半夢中髣髴聞櫓聲

有衣紫衣者以杖觸王之胯曰舟至矣奈何不起王驚寤身忽在舟中見舊所事統領官時統領已降於元元將畏舟壓凡有來附者擲弃水中統領憐王亟藏之艎板下曰取乾餼從板隙投之王掬以食度王之渴乃與王約以足撼板王卽張口向隙受漿居數日事將洩皆彷徨不自安忽颶風吹舟盤旋如轉輪久不能進元將大恐徧求於禱祈者不可得統領知王能巫術遂白而出之王仰天叩齒若指魔鬼神狀風濤頓息元將喜因飲食之至通州賚王數鉅魚送之登岸王歸維揚不樂爲軍伍避去盱眙津里鎮擇地而居以巫術行王無子

生二女長適季氏次卽皇太后晚以季氏長子爲後年  
九十九歲而薨遂葬焉今墓是己臣濂聞之君之之制  
行能感於人固難而能通於神明爲尤難今王當患難  
危急之時神假夢寐挾之以升舟非其精誠上通於天  
何以致神人之祐而至於斯也王之羣行其詳雖若不  
可知舉此而推之則其積德之深厚斷可信矣是宜慶  
鍾聖女誕育皇上以啟國朝億萬年無疆之基於戲盛  
哉昔日史臣贊堯之德首以親九族爲言其效至於黎  
民於變時雍之盛然九族 中母族居其三皇上以念  
母之故思王不能忘封以王爵享以祠廟今又樹碑墓

道以紀其異行是皆以孝治天下也將見四方嚮風咸  
知以孝自勉皞皞熙熙臻夫隆平之治不難矣臣濂旣  
序其事復再拜稽首而獻銘曰

皇帝建國克展孝思疏封母族自親而推錫爵維揚地  
邇帝畿立廟崇祀元冕充衣痛念宅兆卜之何墟閭師  
來告今在盱眙皇情悅豫繼以涕洟卽詔禮官汝徃葺  
治母俾蕘豎跳踉以嬉惟我揚王昔隸戎麾寧風蕩海  
糧絕阻饑天有顯相夢來紫衣挾以登舟神力所持易  
死爲生壽躋期頤積累深長未究厥施乃毓聖女茂衍  
皇支蘿圖肇開鴻祚我巍日照月臨風行電馳自流徂

源功亦有歸無德弗酬典禮可稽聿昭化原扶植政基  
以廣孝治以惇民彝津里之鎮王靈所依於昭萬年視  
此銘詩

銘

揚州蓮花漏銘

宋 韓琦

慶曆六年五月日揚州新作漏刻成知軍州事資政殿  
學士右諫議大夫韓某乃爲銘曰

天運雖大信則不渝智者善作器乃冥符以漏考辰始  
乎渴鳥以箭定刻發乎金徒覆視晷景弗差毫銖節侯  
既正鼓鐘以孚晝訪爾治夜安爾居政則不怠監哉挈

江都縣志

卷十九 藝文志

十三

壺

揚州府譙樓鐘銘

明 羅玘 景南

弘治五秋誰尸此州長清房侯侯耳城譙惟鼓其朝亦  
鼓其宵宵朝匪鐘四紀春冬民罹歲凶凶占厥聲民胥  
告鳴侯夫屬能能簿馬進是治其釁登簏斯震震聲四  
遠實自侯發侯政桓撥撥災爲祥豐年穰穰地久天長

志道堂銘

湛若水 元明  
增城

志道堂者巡鹽侍御芝南徐君遠卿所建於惟揚書院  
之堂也以志道名堂示志道也徐君既治甘泉山書院  
之樓又治惟揚書院之堂何居曰兼以惠教夫惟揚之

多士也若欲藏修以致密則於居惟揚焉若欲游息以廣大則於居甘泉山焉凡以爲道也夫道者天之理也人之路也舍正理是自失其正路失其正路者自賊者也夫理一而已矣以其原於天則謂之命以其性命之主宰則謂之心以其心之生理則謂之性以其循性之所發而由之則謂之道道卽理也以其理出於天之所爲則謂之天理知天之理則知道矣知而弗去確乎而不可奪則謂之志語曰匹夫不可奪志夫不可奪者乃志也可奪非志也夫志也者非徒志也志道也春秋傳曰吾志其目蓋有主之矣徐君請焉作志道堂銘

江都縣志

卷十九

藝文志

十四

維民利生天地自然利王功帝權海歛山明道計功先民有言淮海惟揚有美一人抑功明道維柱史君曷明曷道脩政立教肇開兩院斯文有作或謀廣野或處城府或開或闔或守或悟或以藏脩或以鼓舞恢恢厥堂志道孔彰何名志道聖謨洋洋斯道何道自觀我生自求自得自昭自明維天之命維人之常於維宣聖十五有定以茲而立不惑知命耳順從心初志斯正如彼射者志目弦應如猫捕鼠而視不瞑如木斯根如水斯源以達四海以叅高旻志之志之倚衡叅前學問思辯篤行其先勿忘勿助有廓其門其門維何不少不多有事

無事入中至和何謂中和毫末莫加千里之謬毫釐  
差早辨爾志孰正孰邪

文

揚州勸農文

宋方岳巨山

乃二月壬寅守廣陵趙某誕進州之父老而告之曰淮  
海惟揚州厥土惟塗泥厥田惟下下矧廣陵越在邊圉  
曩則亦有繹騷以患苦吾父老荒而敷菑用不違於厥  
家爾父兄子弟亦惟艱哉今天其佑我宋歲仍大熟有  
逋虔劉宵遁窮北爾父其修乃疆畝濬乃澮洫簡乃  
錢鎛穀乃鋤禾無敢以敬迓天之大豐美守閱再

江都縣志

卷十九藝文志

十五

寒暑罔不一念在爾民東作俶興用咨爾一二父兄惟  
田里熙熙以董太和時則有豐年母訟惟仰父俯子勤  
勞於厥躬時則有豐年母游惟不淫於非爨以愒乃心  
時則有豐年母博惟不狎於甲兵以寧爾婦子時則有  
豐年母很惟爾一二父兄念哉其無斃

詩五言古

廣陵岸北送使

梁陰鏗子堅

行人引去節送客艤歸臚卽是觀濤處仍爲郊贈衢汀  
洲浪已息邗江路不紆亭嘶背櫪馬檣轉向風鳥海上  
春雲雜天際晚帆孤離舟對零雨別渚望飛鳧定能

下淚非但一楊朱

淮南秋夜呈周侶

唐李嶷

天淨河漢高夜間砧杵發清秋忽如此離恨應難歇風  
亂池上萍露光竹間月與君共遊處勿作他鄉別

之廣陵宿常二南郭幽居

李白

綠水接柴門有如桃花源忘憂或假草滿院羅叢萱暝  
色湖上來微雨飛南軒故人宿茅宇夕鳥棲楊園還惜  
詩酒別深爲江海言明朝廣陵道獨憶此傾樽

敘舊贈江陽宰陸調

泰伯讓天下仲雍揚波濤清風蕩萬古跡與星辰高開

江都縣志

卷十九 藝文志

十六

吳食東溟陸氏世英髦多君秉古節嶽立冠人曹風流  
少年時京洛事遊遨腰間延陵劍玉帶明珠袍我昔鬪  
雞徒連延五陵豪邀遮相組織呵嚇來煎熬君開萬叢  
人鞍馬皆辟易告急清憲臺脫余北門厄間宰江陽邑  
翦棘樹蘭芳城門何肅穆五月飛秋霜好鳥集珍木高  
才列華堂時從府中歸絲管儼成行但苦隔遠道無由  
共銜觴江北荷花開江南楊梅熟正好飲酒時懷賢在  
心目掛席拾海月乘風下長川多沽新豐醪滿載剡溪  
船中途不遇人直到爾門前大笑同一醉取樂平生年

一本作太伯讓天下仲雍揚波濤清風蕩萬古跡與星  
辰高開吳食東溟陸氏世英髦夫子特峻秀岳立冠人



曹風流少年少京洛事遊遨驂驪紅陽燕玉劍明珠袍  
一諾許他人千金雙錯刀滿堂青雲土望美期丹霄我  
昔北門厄摧如一枝嵩有虎挾雞徒連延五陵豪邀遮  
來組織呵嚇相煎熬君披萬人叢脫我如貔牢此耻竟  
未刷且食綏山桃非天雨文章所祖託風騷蒼蓬老壯  
髮長策未逢遭別君幾何時君無相思否鳴琴坐高樓  
淥水淨窗牖政成聞雅頌人吏皆拱手投刃有餘地迴  
車攝汪洋時從府中歸絲管儼成行但苦隔遠道無由  
長銜觴江北荷花開江南楊梅鮮掛席拾海月乘風下  
前大笑同一醉  
取樂平生年

### 留別廣陵諸公

憶昔作少年結交趙與燕金羈絡駿馬錦帶橫龍泉寸  
心無疑事所向非徒然晚節覺此疎獵精草太玄空名  
束壯士薄俗棄高賢中回聖明顧揮翰凌雲煙騎虎不

### 江都縣志

### 卷十九

藝文志

十七

敢下攀龍忽墮天還家守清真孤潔厲秋蟬鍊丹費火  
石採藥窮山川臥海不關人和稅遼東田乘興忽復起  
櫂歌溪中船臨醉謝葛强山公欲倒鞭狂歌自此別垂  
釣滄浪前

### 發廣陵留上家兄兼寄上長沙

韋應物

京兆

將違安可懷宿戀復一方家貧無舊業薄宦各飄颻執  
版身有屬淹時心恐惶拜言不得留聲結淚滿裳漾漾  
動行舫亭亭遠相望離晨苦須臾獨往道路長蕭條風  
雨過得此海氣涼感秋意已違况自結中腸推道固當  
遣及情豈所忘何時共還歸舉翼鳴春陽

廣陵行

雄藩鎮楚郊地勢鬱岿雙旌擁萬戟中有霍嫖  
雲助兵氣寶貨益軍饒嚴城動寒角晚騎踏霜橋翕習  
英豪集振奮士卒驍列郡何足數趨拜等卑寮日晏方  
云罷人逸馬蕭蕭忽如京洛間遊子風塵飄歸來視寶  
劍功名豈一朝

初發楊子寄元大校書

悽悽去親愛泛泛入煙霧歸棹洛陽人殘鐘廣陵樹今  
朝此爲別何處還相遇世事波上舟汾洄安得住

廣陵遇孟九雲卿

江都縣志

卷十九 藝文志

十八

雄藩本帝都遊士多俊賢夾河樹鬱鬱華館千里連新  
知雖滿堂中意頗未宣忽逢翰林友歡樂斗酒前高文  
激頽波四海靡不傳西施且一笑衆女安得妍明月滿  
淮海哀鴻逝長天所念京國遠我來君欲還

湖中送敬十使君適廣陵

杜

甫

子襄陽

相見各頭白其如離別何幾年一會而今日復悲歌少  
壯樂難得歲寒心匪他氣 匣滿水置玉壺多遭亂  
實漂泊濟時曾琢磨形容吾校老膽力爾誰過秋晚  
增翠風高湖湧波騫騰訪知己淮海莫蹉跎

廣陵

權德輿

載畧

廣陵實佳麗隋季此爲京八方稱輻輳五達如砥平大  
旆映空色笳簫發連營層臺出重霄金碧摩灝清交馳  
流水轂迴接浮雲薨青樓旭日映綠野春風晴噴玉光  
照地顰蛾價傾城燈前互巧笑陌上相逢迎飄飄翠羽  
薄掩映紅襦明蘭麝遠不散管絃閑自清曲士守文墨  
達人隨性情茫茫竟同盡冉冉行何營且申今日歎莫  
務身後名肯學諸儒輩書窓誤一生

晚步楊子游南塘望沙尾

劉禹錫  
彭夢得城

淮海 夏雨曉來天始晴蕭條長風至千里孤雲生卑  
濕久暄濁拳開偶虛清客遊廣陵郡晚出臨江城郊外

江都縣志

卷十九 藝文志

十九

綠楊陰江中沙嶼明歸帆翳盡日去櫂聞遺聲鄉國殊  
渺漫羈心目懸旌悠然京華意悵望懷遠程薄暮大山  
上翩翩雙鳥征

揚州寒食贈屯田張員外成均吳博士同年殿

省柳丞

宋 王禹偁  
元之 鉅野

前年寒食節待詔直內庭休暇百官出獨掩深嚴扃近  
侍不敢醉賜酒空滿瓶閑就通中枕時聞索上鈴思人  
無何鄉兀然欲忘形去年寒食日 上添專城山歌喧  
里巷春物媚池亭永陽溪水綠琅邪山色青謫宦自道  
遣不敢誇獨醒徃徃取官 時時對花傾醉來念身世

翻使淚縱橫今年蒞淮海時節又清明堆案有留事聽  
歌無懽聲胥徒費簿領使客煩送迎狴牢未空歇堰埭  
勞修營衰病力不支懶慢性已成虛花滿雙目素髮添  
幾莖酒肴畧無味妓樂固難聽誰言寒食下終日 茶  
烹屯田布素交屈此關市征昔年同應舉典衣飛巨觥  
博士東觀客求官得步兵況且丹陛前同爲出谷鶯殿  
丞尹我邑桑枝復弟兄吏隱掌鹺茗終朝看道經三賢  
宴會少七夕休假并何不策我馬廢苑尋放螢何不蕩  
我舟樓基訪摘星三春景欲盡九曲波始平居然逼吏  
役頓此阻交情老態厭春華病身憂宿醒如水若不改  
藉糟亦胡寧解印蓄素志吟詩露丹城維揚非所愛有  
便卽歸耕

揚州池亭卽事

冥心閱羣動亦各取所安胡爲名利人戚戚常鮮歡吾  
生四十四結珮呼郎官掌言入綸閣待詔直金鑾匪謂  
得祿少所嗟行道難前年謫滁州憂畏雙鬢殘賴有琅  
琊溪時濯塵纓冠朝僉徙淮海任重力易殫君恩詎可  
報感激涕汎瀾民瘼不能治惻隱情悲酸况復多病身  
名宦心已闌歸田未果決懷祿尙盤桓公退何所適池  
亭一凭欄旭日媚春草微風生鳴湍阿童勿挾彈留客

不持竿用冀魚鳥馴熙熙肆游觀神仙未可學吏隱聊  
自寬孤吟刻幽石此義非考槃

楊子江觀風浪

蘇舜欽 子美

晚至瓜洲渡繫舟泊西灣 暴風起大浪得縱觀憑  
凌積石岸吐吞天外山霹靂左右作雪灑六月寒吁嗟  
至柔物威壯不可干若爲神龍憑氣勢非一端大艦失  
所操翻覆如轉丸高山雖有路轍險馬足酸居朝號安  
逸重祿多憂患爭得清靜交共騎雙翔鸞矯翹入赤霄  
不見此險艱奈何蚩蚩衆共處天壤間因知古聖人立  
法萬世安濟川作舟梁鑄鼎窮神姦朝廷布禮度粲粲  
江都縣志 卷十九 藝文志 二十一

莫可刪後來漸破壞所向行路難凶邪得騁志物命遭  
摧殘視此念古昔杖藜空盤桓

依韻和劉原甫舍人赴揚州途次贈予翩翩河

中船

梅堯臣 聖俞宣城

我船緩而西君船迅而東緩迅各所尚不意中路逢驥  
馬方騰雲野鶴還就籠亦言出處異同是天地中我豈  
不知命人空嗟其窮何當遂逸性川上作釣翁

同狼山印老早飯建隆遂登平山堂

呂本中 居仁金華

塵埃障西風草木被朝日籃輿郭北門未厭來往

奴嬾不進頗復費呵叱道人先我行宴坐已一室殷勤  
勸客住午飯當促膝爐烟牕紙明鳥語樹葉密却上平  
山堂晚景更蕭瑟澄江渺天際妙語不容乞平生泉石  
念固自有遺失何從兒曹十事九不實茲遊豈不快  
此老固坦率尚從文殊師一往問摩詰

邵伯阻風小泊贈送行諸公 陳 造

長征每愛日小泊 選意陰風自南北客子聽軒輕召  
棠望吾鄉不作秦越異船閣鴈鷺洲人穿魚蝦市相逢  
各吳語知識十三四 實不自買海錯有佳饋餞行餘  
十客超俗見友義笑譚寒谷春爲我洗羈思相與卧玉

江都縣志

卷十九 藝文志

二十二

瓶 燭得微醉老懷易作惡別語母動喙

邵伯停舟辟雨

去年是日之山陽辟雨繁梁作菩薩蠻云

宓度荷芰風舟艤鴛鴦浦落帆憩篙師辟此白涼雨長  
征取愜快留滯不云苦適喜縣麻執爲盪鑠石暑去年  
舟繫柳卧看虹飲渚龍公會事發尙記跳珠語崎嶇不  
諧俗似爲龍所予一盃酬新涼開瓶先酌汝

渡楊子

王其姓者助扶梅安然已濟喜而有作

濤江吞天去委此舟一葉前之恃勇往微命幾顛跲弱  
纜維復解宿浪俄妥帖北風不滿帆晴空欲凌 人  
鄉情重相爲細扶楫浮玉瞥眼過笑譚得利涉窮塗有

快意十北收一捷龍公不常喜未用輕吾怯

竹西懷古

李

易

順之  
江都

淮南昔繁麗富庶天下稱管絃十萬戶夜夜聞喧騰不  
徒竹西寺歌吹相豪矜一朝烽火急塵市爲溝塍風月  
無歡場睥睨皆射棚荒荒野月白照地如寒水自從畫  
江守歲歲輸金繪蕭條閭井間水旱又頻仍我來經故  
里口暮此一登隋唐倏已往遺迹幾廢興江山極蒼莽  
望之涕沾膺

適揚州

明

袁

凱

景文  
華亭

淮海表茲郡東南誠要津近代亦雄藩親王蒞斯民荆

江都縣志

卷十九

藝文志

二十三

吳自茲入燕趙亦來臻舟車無停運孳貸若邱墳剋蓋  
充酈里歌吹咽城闈美酒旣如澠梁肉夾道陳休養近  
百年富庶難具論天道無恒處榮悴每相因風烟一披  
拂奄忽同埃塵空屋嘯蹲鴟崩垣走驚麇萑苻交四野  
黼黻儼若新貴賤不復知賢愚安能分予有山陽遣經  
過屬秋辰憑高肆遐覽落日無行人欲繼蕪城作薄劣  
愧參軍

過江距廣陵三十里值

寄王十一使君

國朝

汪

琬

若文  
長

天陰生暝寒楚客傷寂寞微雨江上來江村杏花落燕

歸柳塘社漁返瓜洲郭何處遠鐘聲孤舟且須泊

新秋楊子橋舟中

王士徵

秋聲渡楊子一雨涼颼發秣陵暮潮歸瓜步殘鐘歇無事悲客心曠如久離別橫笛起宵闌孤篷見微月

上方寺觀蘇公送使石刻次原韻

汪楫舟次江都

鳳吹亦已歇古寺空鳴蟬琅玕一丈碧寂寞埋寒烟尋幽賴法曹謂王阮亭司理升之頽垣顛馬蹄踏不碎爛熳銀鈎

懸我嘗擬蘇公蓬萊無此仙文菽與功業得一皆足賢橫空盤百字味敵庭中泉含咀最甘冽延佇尤便娟夙

江都縣志

卷十九藝文志

二十四

昔不自量驚驥思聯翩十年重拂拭貞珉嗟徒然

詩七言古

琴歌揚州送別

唐李頎洛陽

主人有酒歡今夕請奏鳴琴廣陵客月照城頭烏半飛霜淒高樹風入衣銅爐花燭獨增輝初彈綠水後楚妃一聲似動物皆靜四座無言星欲稀清淮秦使千餘里敢告雲山從此始

還揚州許書記家集許渾孫進家集得官

宋王禹偁

君不見近代詩家流胡爲蹇滯多窮愁孟郊顛賴死



旅浪仙斥逐長江頭張生漂泊冬瓜堰徒云輕薄萬戶  
侯浩然無成鹿門去李恂慟哭昭陵休生無風教興王  
化死無勲爵貽孫謀可憐詩道日已替風騷委地何人  
收高陽許公精六義獨向聖朝生後嗣因將先集進九  
重高步金臺曳珠履祖德光輝聖主知府尹賢明丞相

時維揚權牧卽故  
中令薛相之子

廣陵郡大古九州記室官清外三

事遂令天下學詩人健美君家窮四始我來迎侍游江  
都玳筵往往陪歡娛遂求家集恣吟諷海波乾處堆珊  
瑚因思賈孟數家一何苦詩鬼螫螫餒無主子孫淪沒  
誰及君閑倚紅蓮傾淥醕草檄餘閑好賦詩莫放風情

江都縣志

卷十九 藝文志

二十五

忝爾祖

廣陵大雪

韓琦

淮南常歲冬猶燠今年陰沴何嚴酷黑雲漫天一月昏  
大雪飛揚平壓屋風力軒號助其勢擺撼琳琅推凍木  
通宵徹晝不暫停堆積樓臺滿溪谷有時造出可憐態  
柳樹梨花亂紛撲乘溫變化雨聲來度日階庭恣淋漓  
幾縈寒霰不成絲驟集疎簷還掛瀑蟄蛙得意欲擲  
幽鷺無情成挫辱罾魚江叟冰透蓑賣炭野翁泥沒輻  
閭閻細民誠可哀三市不喧游手束牛衣破解突烟  
餓犬聲微饑了哭我聞上天時澤亦有常數滋農穀

膏潤均於一歲中是謂年豐調玉燭此來盛冬過爾多  
却慮麥秋欠霑足太守憂民仰天祝願御名氛霾看晴旭  
望晴不晴無奈何擁被醉眠頭更縮

東坡先生移守廣陵以詩往迎先生以淮南旱

書中教虎頭祈雨法始走諸祠卽得甘澤因

爲賀

晁無咎補之 鉅野

去年使君道廣陵吾州空市看雙旌今年吾州歡一口  
使君來爲廣陵守麥如櫛髮稻立錐使君憂民如已饑  
似聞維舟禱靈塔如絲氣上淮西睢隨軒膏澤人所待  
風伯何知亦前戒虎頭未用沈滄江龍尾先看掛清海

江都縣志

卷十九 藝文志

二十六

爲霖功業在傅巖如何白首擁彤幃世上讒夫亂紅紫  
天教仁政滿東南青袍門人老州佐於世無成志消情  
封章去國人恨公醉笑從公神許我瓊花芍藥豈易逢  
如淮之酒良不空一釂孤鴻烟雨曲平山堂上快哉風

楊子江阻風

王令逢原 廣陵

楊子江風十月初西駕巨浪東無隅常憂傾搖地爲動  
意欲起塞天無虛大舟不行就繫岸小舟分去爭得魚  
舟中壯士起坐笑有酒更爲斜陽酌

楊子江頭遇仙行

元吳萊淵 穎 江

晴沙獵獵吹林莽日晚南犇命如縷延秋門上啼

楊子江頭暗風雨就中五馬一馬龍獨據滄海超河宗  
塵侵犀筋不復飶鬼瞰寶玦難爲容蓬萊仙人按城堡  
蕭國芎藭何足道氏族無憑指素波刀圭不用授靈草  
萬里蒼茫豈所聞須臾變滅但荒雲東南王氣今溟漠  
夢入三山見樓閣

運夫謠送督運部使之揚州

明邊

貢

廷實  
歷城

運船戶來何暮江上旱風多春濤不可渡運船戶來何  
暮裏河有牖外有灘斷篙折纜愁轉般夜妨蟲鼠日妨  
漏糧冊分明算升斗官家但恨倉廩貧不知淮南人食  
人官家但知征戍苦力盡誰憐運船戶運船戶爾勿哀

江都縣志

卷十九

藝文志

二十七

司農使者天邊來

廣陵行

王廷相

子衡  
儀封

野客回橈噴雪霜廣陵煙水春迷茫海門潮上如砒石  
楊子逆捲飛濤長古來形勝眼前在人事紛靡物華改  
二十四橋赤闌新祇今明月常相待荒亡之帝千餘秋  
不忍言之赤子愁離宮別院七十二此生欲偏人間遊  
翠華宮中夜啼鳥天子詔幸惟揚都九門車馬如風雨  
宰相已進南巡圖諫官叩陛侍者麾玉姬被逐卜臣危  
嵩靈河伯駭以走洪波不留風倒吹山鷄翡翠空如錦  
誰能留住鳳凰兒彩旆初臨汴河澣飛心已入金山浦

龍舟不載羽林軍錦纜成行紫宮女宮女明粧皎白雪  
却愛瓊花光艷絕不道蛾眉能悞人翻使君王棄宮闕  
蕭牆禍變豈虛作斗外天狼夜蝕月千年寶井生琉璃  
猶有精靈自嗚咽楚關吳口山水明紫霄終夜浮雲生  
朝市變盡滄波綠不斷扁舟載客行客行繚繞隋皇堤  
堤上春風楊柳齊傷心欲弔前朝事楊葉楊花路轉迷

廣陵贈楊戶曹

唐

龍

虞佐  
蘭谿

戊子之秋江上行君乘短舫來將迎風檣如馬不可停  
蒼煙白水空有情五月菖蒲匝江綠仍到江頭采民俗  
雲津倏停使者車細雨長談照明燭周道透遲肅采齊

江都縣志

卷十九

藝文志

二十八

胸中煥爛羅珠璣昔日此城不相見今日却恨相見遲  
相見何遲別何亟江籬河柳映秋色十里漕艘一呼吸

揚州春眺卽事

張元凱

左虞  
吳縣

紫萸村邊楊子灣黃公鑪吏使者關舟楫遠通淮北水  
樓臺近見江南山高岡百尺臨官渡浮煙不盡斜陽暮  
前朝楊柳幾株存寒鴉飛盡蕪城路

揚州謠二首

來

復

陽伯  
三原

長淮千里水流過廣陵市水韻如有情蕭條咽閭里我  
作使君恩未宣虛乘舸舸媿登仙却嫌金鼓嘈嘈響驚  
起鳧鷖不近船

水融湖上郭雪擁浪花白漕流湖沒堤愁殺風帆  
岸禿楊倒着身年年稱熟半沉湮遠賈邨農搔首去誰  
知二十四橋春

揚州春

國朝 杜

濬于皇黃岡

揚州春迎春自東郭盡道今年官作春先期三日行催  
索積雪泥深一尺餘倡婦挾瑟乘肩輿紅粧半露疎簾  
裏不知顏色還何如春日諸官宴綵幄此曹勸酒須唱  
曲請君但聽曲莫聽六街三市哭

柳花歌寓蕪城作

毛

甡

大可蕭山

春風濯濯江南路吹過邗關到瓜步邗關三月春草長

江都縣志

卷十九

藝文志

二十九

青樓大道怨春陽陽春初開自杲杲大道花飛一何早  
清明漸近細雨來繞樹游絲墮縹緲游絲縹緲繞如霧  
飛入隋堤柳條住隋堤柳色青瓏瓏媿媿流鶯啼不去  
流鶯啼處停玉鑣依依拂面盡長條揮鞭旣度紅欄曲  
驅車還上綠楊橋紅欄綠柳心斷絕隋苑隋堤有離別  
新聲三疊何處吟弱線千條倩誰折可憐青草及春暮  
可憐綠柳低還仆青樓曳翠綦酒壚白馬連錢繫歸渡  
低枝毳毳接長坂高枝蓬蓬白花滿茫茫飛雪繞去遲  
冉冉輕綿冑來晚翩隨晚蝶冑朱花緩向春烟拂  
幾時飄飄落西苑幾時流蕩去南家南家西苑兩相棄

流蕩飄飄日顛賴春風吹去不上天春燕銜將復垂地  
初翻積雨障輕塵更度粧樓裊素茵滿眼離披不知處  
愁殺東西行人

紅橋春遊戲爲隔離梅花歌

王式丹

方若  
寶應

梅花欲開未開時西行湧浪天之涯還尋烟花及三月  
猶行春風千萬枝可憐揚州好風景紅橋橋畔斜陽影  
連岡壓水園林多一川霞浸燕支冷画舫爭裝歌吹歸  
名花寂寞誰管領我亦來游盪小航柳絲迎客何飄揚  
拉俘漫思載酒地眼前無處容清狂隔離遙見花幾樹  
牽舟便向花旁住聽歌都是懊懽歌偷眼穠華奈汝何

江都縣志

卷十九

藝文志

三十

似聞小鳥向花語籬邊有客潛窺汝低鬟障袖雲橫渚  
芳氣幽通心暗許誰教咫尺空延佇相逢且喜得相憐  
留春莫放東風顛更待花陰一醉眠

詩  
五言律

廣陵別薛八

一作送  
友東歸

唐

孟浩然

襄陽

客有不得志棲棲吳楚間廣陵相遇罷彭蠡泛舟還檣  
出江中樹波連海上山風帆明目遠何處更追攀

廣陵贈別

李白

玉瓶沽美酒數里送君還繫馬垂楊下銜盃大道間天  
邊看淥水海上見青山興罷各分袂何須醉別顏

客廣陵

王昌齡  
江少

樓頭廣陵近九月在南徐秋色明海縣寒煙生里閭夜  
帆歸楚客昨日渡江書為問易名叟垂綸不見魚

揚州偶會前洛陽盧耿主簿  
應物頃貳洛陽常有連騎之遊

韋應物

楚塞故人稀相逢本不期猶存袖裏字忽怪鬢中絲客  
舍盈樽酒江行滿篋詩更能連騎出還似洛橋時

泊揚子江岸

盧綸  
允言河中

山映南徐暮千帆人古津魚驚出浦火月照度江人清  
鏡悲雙鬢滄浪寄一身空 芳草色長接故園春

江都縣志

卷十九 藝文志

三十一

揚州雨中張十七宅觀妓

張謂  
正言河南

夜色帶寒烟燈花拂更然殘粧添石黛豔舞落金鈿掩  
笑須欹扇迎歌乍動弦不知巫峽雨何事海西邊

廣陵送林宰

李嘉祐  
從一趙州

清政過前哲香名達至尊明通漢家籍重識府公恩春  
景生雲物風潮斂雪痕長吟策羸馬青楚入關門

廣陵別鄭處士

高適  
達夫海蓀

落日知分手春風莫斷腸興來無不愜才在亦何傷溪  
水堪垂釣江田耐插秧人生只為此亦足傲羲皇

途次維揚望京口寄白下諸公 蔣 渙

長興

林多是宅車馬少於船莫喚遊人住遊人困不眠

廣陵道中

許

渾

用丹陽

城勢已坡陀城邊東逝波綠桑非苑樹青草是宮莎山  
暝牛羊少水寒見鴈多因高一回還詠黍離歌

廣陵寒食夜

李

中

有申隴西

廣陵寒食夜豪貴足佳期紫陌人歸後紅樓月上時綺  
羅香未歇絲竹韻猶遲明日踏青興輸他輕薄兒

寒

王禹偁

寒食江都郡責旗賣楚醪樓臺藏綠柳籬落露紅桃妓  
女穿輕屐笙歌泛小舸使君慵不出愁坐讀離騷

江都縣志

卷十九

藝文志

三十二

次鮮于子駿瓜洲韻

蘇

轍

子由眉山

天高山近海春盡水生池禾黍多新恨川原自昔時花  
存故苑麗樵出舊城隳莫望瓜洲渡曾經駐佛狸

揚州

米

芾

元章太原

東風何索寞帶雪入揚州尙想遺釵雀重觀上玉鈎眞  
同一夢覺空憶十年遊邂逅逢孫楚酣歌慰滯留

登揚州城北門予昔侍親寓居此城下驛舍十

八年矣愴然感動

劉

敞

州

昔釣城下水今來十八年居人能幾在里巷獨依然手  
種成喬木躬耕有廢田悲歌顧千騎不覺涕淪漣



北望情何限南行路轉深晚帆低荻葉寒日下楓林雲  
白蘭陵渚煙青建業岑江天秋向盡無處不傷心

和裴端公樞蕪城秋夕簡遠近親知

竇常中行

歲積登朝戀秋加陋巷貧宿醒因夜歇佳句得愁新盡  
日憑幽几何時上軟輪漢廷風憲在應念匪躬人

曉發瓜洲

李端正已趙郡

曉發悲行客停橈獨未前寒江半有月野戍漸無煙棹  
唱臨高岸鴻嘶發遠田誰知避徒御對酒一潸然

九日廣陵同陳十五先輩登高懷林十二先輩

江都縣志

卷十九藝文志

三十三

歐陽詹行周晉江

客路重陽日登高寄上樓風煙今令節臺閣古雄州泛  
菊聊斟酒持萸嫩插頭情人共惆悵良久不同遊

揚州

杜牧牧之京兆

煬帝雷塘土迷藏有舊樓誰家唱水調明月滿揚州駿  
馬宜間出千金好暗游喧闐醉年少半脫紫茸裘

秋風放螢苑春草鬪雞臺金絡擎鷗去鑾環拾翠來蜀  
船紅錦重越橐水沉堆處處皆華表淮王奈却回

揚州春詞

姚合硤石

廣陵寒食天無霧復無煙煖日凝花柳春風散管弦園

廣陵

借韻戲用  
文潛體

呂本中

往來六十里各是一江郊柳色團渦岸春風楊子橋好  
山當斷岸野鳥度空巢一任雷塘路暮天風雨號

維揚客舍

劉克莊

潛夫  
莆田

久作揚州客愁來未易禁頗知邊地事愈動故園心花  
譜猶堪續橋名不可尋却疑張祜輩泉下有新吟

揚州

明汪廣洋

朝宗  
高邱

憶昔曾遊地於今有幾家濕雲纏戍鼓高柳聚城鴉元  
鶴去無迹綠蕪愁更賒盈盈江上月何處照瓊花

瓜洲夜泊

錢宰

于予  
會稽

江都縣志

卷十九

藝文志

三十四

旅夜瓜洲泊秋懷浩沈星河與海合江漢入吳深天  
塹無南北川流自古今隔花漁唱起千里故園心

晚過揚州

劉溥

原博  
長洲

長河懸落照短棹尚孤征衰柳愁邊斷殘霞雨外明人  
喧楊子渡鐘動廣陵城漸去鄉關遠淒然倍旅情

廣陵晚發

張時徹

惟靜  
鄞縣

征夫逐草露夜夜月中眠霧擁清猿嘯風吹白鴈旋有  
江能繪樹無路不生烟旭日秋光淡芙蓉亦可憐

泊維揚

皇甫汸

子循  
長洲

地是南來域江分北望賒空餘前代宇不放昔年花物

色圖丹壁春風想翠華誰憐歌舞處日暮有啼鴉

出楊子橋喜見江南山色

郭 第

次長洲

小艇淮南道經過無限情可憐楊子渡不見海潮生水

斷瓜洲驛江連北固城漲沙三十里樹杪亂山橫

揚州感興

金 鑾

在衡隴酒

迢遞古揚州重來異昔遊春風吹酒幔日暮土歌樓夢

覺翻疑雨愁多不待秋翩翩征鴈起依舊向沙頭

瓜洲風雨不克渡江

徐 階

子舟華亭

未遂歸來願空驚歲月奔布帆三日雨茅屋數家村山

氣遙連海江聲近在門無緣得飛渡東望欲消魂

江都縣志

卷十九 藝文志

三十五

邵伯湖夕泊

于慎行

無垢東阿

日暮倚蘭橈秋江正寂寥驛門斜對雨郡郭遠通潮急

櫓看商舶寒燈見市橋隋堤前路近欲聽月中簫

清明日泊楊子江

朱 諫

君佐永嘉

楊柳夾江青東風潮正平雲間旋屋市沙際聽鼙更萬

水俱東逝孤舟更北征不知時序改今日是清明

揚州曉泊

袁宏道

伯修公安

薄霧隨風盡寒霜對酒銷芋魁騰曉市蟹子落歸潮

事瓊花觀新溝楊子橋雖然富羅綺未必似前朝

揚州郭外

費經虞

扶杖出門去春郊事盡非棘生馳馬路水沒古人磯巢  
毀鶯雛散天寒鶴語稀故鄉畊種早飄泊不能歸

平山堂留別穉恭友沂穆倩

國朝

周亮工

元亮  
祥符

直北踪無定淮南路未通寒沙迷古驛濁酒紀春風嶺  
客新呼酒吳兒學挽弓臺前人影亂何處盼飛鴻

廣陵贈別袁籜庵

曹

溶

秋嶽  
秀水

聯舫邗溝路雲濤興渺然柳無經歲別月似故山圓老  
淚霑歌板歸裝儉秫田桓家寒具美一飽足高眠

宜陵

王士徵

向晚宜陵渡孤帆踏暝流千家漁火亂兩岸候蟲秋何

江都縣志

卷十九

藝文志

三十六

處宮人墓長懷帝子樓客愁兼弔古今夜廣陵舟

發維揚

嚴繩孫

蓀友  
無錫

輕舫春流上烟光淨客衣岸知緣海澗山自渡江稀細  
路花將盡空村燕不飛浮家吾自可白首共漁磯

九日揚州文星閣登高

鄧漢儀

孝威  
泰州

徑僻人稀到林深菊未荒吾儕尊九日天地老斜陽渺  
渺江淮路蕭蕭吳楚鄉但宜傾濁酒無力問滄桑

詩

五言排律

揚州卽事

元

宋

无

子虛  
晉

玉壘開方面金湯控上游連營驃騎宅重析鴈行樓

弩虛空發飛橋日夜浮烟生烽燧地草死虎狼秋此處  
兵威震當時國步憂六年襄郡守三箇蓋臣謀大將深  
圍陷長江萬里休兩淮先按堵孤注獨橫籌破竹纔乘  
勢聞風已置郵乾坤機軸轉海嶽版圖收春變山堂柳  
波通汴水鷗平坡南下馬遠渡北來舟無復瓊花夢猶  
餘芍藥愁塵埃何豎子還擁黑貂裘

過維揚作

明 皇甫孝  
子安 長洲

念昔恭明祀三秋滯楚鄉今來還上國五月渡維揚戀  
土情何極瞻塗意轉長川原歷迢遞烟樹引微茫浴渚  
飛鳧下驚沙白鷺翔江隅有芳草幽思獨難忘

江都縣志

卷十九

藝文志

三十七

登廣陵城臺

壬午寓揚州任

國朝 李沂  
艾山 興化

城闕凝春望人烟落照中山河仍禹甸草木自王風地  
控江淮阻途兼南朔通菁華騰楚域國俗染隋宮野曠  
羅紈合衢長錦繡充星繁開綺戶鱗次列珠龔柳葉歌  
催放池冰酒滴融促絃繁亂蝶悲管咽孤鴻雜沓隨高  
蓋登臨集鉅公因依盟指目擺脫氣凌虹石座珊瑚大  
秦樓翡翠濛王孫金鑿落娼女玉玲瓏選勝朝朝聚留  
歡處處同晴漪浮桂楫煖榭長蘭叢烽警遙傳北星氛  
歛轉東庶司方悄悄諸務頗匆匆競插魚囊箭俱張虎  
鬯弓教場喧閱武太守勉臨戎百雉修墉峻羣龍書幟

雄軍需供賈客兵仗執兒童細草蕭條綠繁花寂寞紅  
從來佳麗地回首意無窮

次揚州

毛 甡

八月隋堤柳三秋楊子波南朝曾作鎮大業舊開河螢  
苑銷花草瓊臺尙綺羅雷塘宮北舞水調竹西歌高旆  
京漕粟長船蜀估鮪重闥如合璧交埂勝連珂京口雲  
生晚淮南木落多蕪城吾有賦騁望意如何

詩 七言律

酬樂天揚州初逢席上見贈

唐 劉禹錫

巴山楚水淒涼地二十三年棄置身懷舊空吟聞篴賦

江都縣志

卷十九 藝文志

三十八

到鄉翻似爛柯人沈 側畔千帆過病樹前頭萬木春  
今日聽君歌一曲暫憑杯酒長精神

宿揚州

李

紳

公垂無錫

江橫渡濶烟波晚潮過金陵落葉秋嘹唳塞鴻經楚澤  
淺深紅樹見揚州夜橋燈火連星漢水郭帆檣近斗牛  
今日市朝風俗變不須開口問迷樓

入揚州郭

潮水舊通揚州郭內大曆已後潮信不通李頎詩  
鷓鴣山頭片雨晴揚州郭裏見潮生此可以驗

菊芳沙渚殘花少柳過秋風墜葉疎堤繞門津喧井市

路交村陌混樵漁畏衝生客呼童僕欲指潮痕問里間  
非爲掩身羞白髮白緣多病喜肩輿

揚州看辛夸花

皮日休  
襄美陽

臘前千朵亞芳叢細膩偏勝素柰功螾首不言披晚雪  
麝臍無主任春風一枝拂地成瑤圃數樹參庭是藥宮  
應爲當時天女服至今猶未放全紅

瓜洲留別李詡

許渾

泣玉三年一見君白衣顛賴更離羣楊堤惜別春潮晚  
花榭留歡夜漏分孤館宿風帶雨遠帆歸處水連雲  
悲歌曲盡莫重奏心遶關河不忍聞

江都縣志

卷十九 藝文志

三十九

江都

羅隱  
昭諫餘杭

淮王高讌動江都曾憶狂生亦坐隅九里樓臺牽翡翠  
兩行鴛鴦踏真珠歌聽麗句秦雲咽持轉新題蜀錦鋪  
惆悵晉陽星拆後世間兵革地荒蕪

重九日廣陵道中

秋山抱病何處登前時韋曲今廣陵廣陵大醉不解悶  
韋曲舊遊堪拊膚佳節縱饒隨分過流年無奈得人憎  
却驅羸馬向前去牢落路岐非所能

過揚州

韋莊  
端已京兆

當年人未識兵戈處處青樓夜夜歌花發洞中春日永

此似古体  
如何又附  
七得内

月明衣上好風多淮王去後無雞犬煬帝歸來莖綺羅  
二十四橋空寂寂綠楊摧折舊官河

將去廣陵別史員外南齋

宋徐鉉  
江都臣

家聲曾與金張輩官署今居何宋間起得高齋臨靜曲  
種成奇樹學他山鴛鴦終日同醒醉蘿薜常時共往還  
賤子今朝獨南去不堪迴首望清閑

芍藥詩

揚州僧舍植數十本牡丹落時繁艷可愛因賦詩三章書於僧壁

王禹偁

牡丹落盡正淒涼紅藥開時醉一場羽客諳傳尸解術  
仙家重蕪返魂香蜂尋檀口論前事露濕紅英試曉粧

江都縣志

卷十九 藝文志

四十

曾忝掖垣真舊物多情應認紫薇郎  
東君留着占殘春得得遲開亦有因曾與掖垣留故事  
又來淮海伴詞巨日燒紅艷排千朶風遞清香滿四鄰  
更愛綠頭弄金縷異時相對掌絲綸  
滿院勻開似赤城帝鄉齊點上元燈感傷綸閣多情客  
珍重維揚好事僧酌處酒杯深蘸中折來花朵細舍稜  
老郎爲郡辜朝寄除却吟詩百不能

廣陵

蔡襄  
君謨

廣陵歸客歎飛蓬懷古傷離向此中前世翻波那復問  
十年彈指已成空樓頭畫角催殘日城上寒鴉噪晚風



井徑蕭條人不見又隨潮信度江東

揚州感舊懷古

王巖叟

彥霖大名

隱隱蕪城枕碧流繁華曾是帝王州一聲水調滿明月  
十里春風半畫樓白鳥不離圖上去江雲長在鑑中遊  
廢興屈指千年事何異行人寄傳郵

揚州留一上人

呂本中

日日東風吹客衣小園春在掩芳菲殘花過雨飄零盡  
好鳥穿林自在飛往事虛成采薇瘦故人頻有食言肥  
知公未厭西行晚且伴江船緩緩歸

見淮東制帥趙南仲侍郎相待厚甚特送買山

江都縣志

卷十九

藝文志

四十一

錢又欲刊石屏詩置於揚州郡齋話別敘謝

戴復古

式之黃巖

如公當向古人求識面何須萬戶侯浪說釣鰲游瀚海  
眞成騎鶴上揚州受恩多處難爲別宿酒醒時始覺秋  
回首平山堂下路不堪風雨送歸舟

瓜洲阻風

宋伯仁

器之菑川

狂風未許放歸船借得僧房半榻眠落鴈影收帆脚外  
怒濤聲到枕頭邊黃蘆葉底秋將老白羽書中病未痊  
傳語將軍多得力揚州不比舊家年

趙龍學寄陽羨茶爲汲蜀井對瓊花烹之

三印誰分陽羨茶自煎蜀井瀾瓊花數間明月玉川屋  
兩腋清風銀漢槎團鳳烹來奴僕等老龍畢竟當行家  
相思幾夢山陰雪搜攬平生書五車

揚州

汪元量

大有錢唐

重到揚州十載餘畫橋雨過月模糊后皇廟裏花何在  
煬帝隄邊柳亦枯陂麥青青嘶亂馬城蕪冉冉落羣烏  
人生聚散愁無盡且小停鞭向酒壚

揚州敘遊

賀

鑄

方回開封

迷藏九曲屬樵畊野草閒花故有情廢苑春風故如許

江都縣志

卷十九

藝文志

四十二

隔江山色可憐生新聲度曲復誰道古井酌泉聊獨清  
杜紫微靈定相笑青樓薄倖不知名

舟次廣陵懷寄京都交舊

朋遊冠蓋滿京華病客東流迹自賒音驛未聞來日下  
鄰牆不見亦天涯尙慙斗粟煩官廩已指扁舟是我家  
莫謂因風無可寄雪梅開遍獵前花

興教寺勸農呈史君

徐鹿卿

德夫豐城

自從豳雅無傳後漢有龔黃宋有羅夙駕朱轡勤勸相  
奉宣黃紙放催科一犁烟雨郊原曉千里春風嶺嶠和  
看取便民橋下水滿江濃綠漲恩波

題揚州驛

元 薩都刺 天門雁門錫

銀燭高燒照不眠呼兄飲馬吸清泉寒砧萬戶月如水  
塞鴈一聲霜滿天金縷歎歌來枕上銀瓶索酒到亭前  
明朝走馬燕山道贏得紅樓說少年 鴈門集過廣陵驛一首云秋風江上芙蓉老階下數株黃蔥鮮落葉正飛揚子渡行人又上廣陵船寒砧萬戶月如水老鴈一聲霜滿天自笑棲遲淮海客十年心事一燈前

中秋廣陵對月

張翥 仲舉晉寧

散盡浮雲月在東白蕉衫冷小庭空星河夜影尊壘裏  
城郭秋聲鼓角中落葉有光時墜露鳴蛩無響不含風  
此生五十三回見只遣嫦娥笑禿翁

江都縣志

卷十九 藝文志

四十三

憶廣陵舊事

君王昔在鎮南年賓客風流日滿筵上國旌旗分一半  
層臺歌舞宿三千豪華遽悲離黍形勝空存慘莫煙  
多少楚魂歸未得江流無際海連天

過揚州

劉秩 伯序豐城

廣陵不見舊風烟楚客登臨思惘然水落魚蝦常滿市  
湖多蓮芡不論錢干戈滿地懷今日歌舞連天記昔年  
獨有長橋秋夜月照人猶自弄嬋娟

揚州

成廷珪 原常寶應

老夫住近山陰曲萬竹中間一草堂開徑不曾防俗客

讀書恰是得清涼好風時時動環佩明月翩翩來鳳凰  
止與君家軒子似可能携酒共尙羊

舟次邵伯有懷徐幼文

明楊基  
孟載嘉州

文章小技耻雕蟲也逐群才赴洛中多病不宜秋色裏  
相思只在暮江東鷄豚籬落茅茨雨鳧鴨池塘菡萏風  
欲買一樽澆寂寞傷心不與故人同

過揚州

王冕  
元章諸暨

東南重鎮是揚州分野星辰近斗牛人物漸分南北異  
江淮不改古今流瓊花香委神仙佩楊柳風閑帝子舟  
十里珠簾晴不下銀鬕翠管滿紅樓

江都縣志

卷十九 藝文志

四十四

廣陵懷舊

汪廣洋

官柳陰陰鎖汴橋暖催晴綠上蘭橈花迎后土依然在  
人去東風不可招紫陌漸稀春試馬青樓殊絕夜吹簫  
回看烽火連雲起應使江淹歡寂寥

過揚州

李質  
文彬德慶

三十年前記此過皆春樓下駐行窩十千一斗金盤露  
二八雙鬢玉樹歌自昔瓊花祠后土至今荆棘卧銅駝  
江都門外王孫草怨入東風綠更多

抵瓜洲

唐肅  
處會

春雨春潮撼客懷舟中十日九陰霾江名天塹元通蜀

地入瓜洲始接淮我笑銀杯能羽化君看寶劍或塵霾  
明朝又過揚州去無復瓊花舊觀碑

廣陵雜興

袁華  
子英  
崑山

十年不到廣陵城依舊瑤芳弄晚晴繡被土甌于闐寺  
寶裝刀劍鎮南營樓飄簫鼓雲中響地接煙花日外明  
小杜風流今寂寞誰攜紅袖按新聲

長江天險隔南徐千古英雄恨有餘玉樹歌殘龍虎地  
錦帆船下斗牛墟柳迷竹浦寒鴉聚水漫雷塘野老漁  
欲弔文章賢太守山堂零落昔年書

維揚懷古

胡儼  
若思  
南昌

江都縣志

卷十九

藝文志

四十五

維揚自昔盛繁華香靄彤樓映曉霞野店停舟詢往事  
水亭吹笛是誰家人尚說金盤露仙子空遺玉樹花  
二十四橋明月在垂楊幾樹照棲鴉

過揚州

史謹  
公謹  
崑山

長空開霽晚霞明篷底淮山隔岸青鴉散黑雲爲陣勢  
楓飄紅雨作秋聲蕃釐玉樹應無種東閣官梅尙有名  
惆悵牧之招不得與誰同醉竹西亭

過楊子江

王鏊  
濟之  
蘄州

燕南倦客江東去一見澄江眼爲開紅日遠疑從地起  
青山近欲傍人來中流擊楫空懷志南國持衡獨愧才

漸覺故鄉風物近十年一到思悠哉

寓揚州

朱士稚  
山陰虎

淹留車騎引杯看獨上高樓愁未闌千里鄉關聞過鴈  
萬家風雪醉憑欄天涯客子依人苦江上梅花倒地殘  
莫道春來動南北故人尺素遠長安

渡楊子江寄吳氏伯仲

王穉登  
百穀長洲

烟中流水曉潺潺楊子津頭雨一灣沾袖成斑皆客淚  
隔江如黛是家山欲探子母羞錢篋未卜雌雄泣劍環  
寄語吳郎三玉樹莫因裘敝笑人還

過揚州

宗臣  
子相興化

江都縣志

卷十九 藝文志

四十六

湖上行吟落日邊高秋蕭索倍淒然蕪城舊識參軍賦  
玉樹空傳帝子篇隋苑雲殘楊柳色邗江夜斷荻蘆烟  
可憐白舫青蓑者尚有漁歌似昔年

清明揚州道中憶王端公

朱曰藩  
子价寶應

江花江草淨春烟北望空懷乘興船水國人家種楊柳  
清明士女競鞦韆客厨未乞龍蛇火旅食頻催犬馬年  
遙想風流王柱史西臺銀燭柘顛

秋晚登廣陵城

歐大任

西風淮水下邗溝何處關山獨倚樓賦後蕪城荒井逕  
書來瓜渚斷江流青天寒色千砧夕滄海潮聲萬弩秋

滿目蒼蒼見平楚不知歌吹在揚州

揚州

侯

泓

嘉研

五月江城江水深蕪城斜日獨披襟關河輸輓交南北  
樓閣烟花自古今佳節未移鄉國與薄游還媿故人心  
十年蔓草梅花嶺手把蒲葵淚不禁

廣陵別景升小修

袁宏道

搔頭幾日見新絲二月河橋上馬時長短官街驚夢鼓  
高低楊柳罨長枝江烟一擔充行李流水三义多路岐  
北地南天千萬里青巾白袷幾人知

十六夜登瓜洲城看月懷舊寄所親

江都縣志

卷十九

藝文志

四十七

程嘉燧

孟陽休寧

十年曾宿焦山寺浪急天寒少客行明日片帆仍遠道  
一時雙眼復孤城暮山欲盡離尊歇黃葉全稀白髮生  
別後故人無限意隔江同見月初盈

揚州方季康館同張伯美諸人惜別

別路江南已數程清樽細雨復江城殘魂如夢聞鶯斷  
舊恨隨潮立馬生皈佛一心憐伴在驅人十口悔身輕  
臨歧共有沾衣淚却使衰羸暗撫纓

廣陵別友

葉向高

臺山福

浮生底事最堪愁畏路馳驅易白頭兩度相逢重

一經離別又三秋菊當有酒花偏媚身到無官夢亦休  
後會登高何處是年年回首憶邗溝

題廣陵菽園

錢謙益 受之常熟

架構平臨邗水涯隋堤迎却俯塵沙南塘路識將軍第  
東閣梅如水部衙十里珠簾叢腐草二分明月冷梅花  
輕軒奉母承平事會有新詩補白華

十月朔日抵廣陵

隋苑荒臺葉不飛竹西歌吹正依稀流螢尚作蕪城夢  
跨鶴眞同華表歸舊事月明空在眼新愁水調欲沾衣

笊籬灣畔孤墳在萬點寒鴉送落暉 故人顧所建墓在笊籬灣

江都縣志

卷十九 藝文志

四十八

同陳百善諸子竹西舟泛作

梁以樟 公狄清苑

寒城烟雨濕棠梨舊事風流話竹西香草夢携三楚句  
黃墟人換六朝題耳邊棊墅過王謝林下琴厨笑阮嵇  
斜日洒醒誰喚得一聲江月落銅鞮

揚州

國朝 吳偉業 梅村太倉

疊鼓鳴笳發棹謳榜人高唱廣陵秋官河楊柳誰新種  
御苑鶯花豈舊游十載西風空白骨廿橋明月自朱樓  
南州枉作迎鑾鎮難博雷塘土一邱  
撥盡琵琶馬上絃玉鈎斜畔泣嬋娟紫駝人去瓊花院  
青塚魂歸錦纜船荳蔻梢頭春十二茱萸灣口路



隋堤壁月珠簾夢小杜曾游記昔年

廣陵感懷

龔鼎孳 芝麓合肥

落日櫓搖蓬鬢客蕪城秋老菊花時鴈迴玉塞知鄉路  
草接銅駝上遠陂南國旌旗潮外隱錦帆簫管月中悲  
天高風急仍鉦鼓岐路徘徊安所之

蕪城中秋念舍弟峻公

周亮工

却聽長年停棹語今年佳節在蕪城江邊秋月無雙色  
客裏歸鴻第一聲靜夜扣舷他日淚深卮俛首故園情  
不知時序何由變忍使燈前念弟兄

留別揚州

林古度 茂之福清

江都縣志

卷十九 藝文志

四十九

不到揚州五十年繁華逝水倍淒然來尋朱戶多移主  
歸賞青山不費錢三伏薰風憐潦倒二分明月惜周旋  
何能老我重相訪再酌樓靈第五泉

揚州九日同姜如農王西樵程穆倩登高

宋 琬 荔裳萊陽

塞鴻猶未到蕪城載酒登樓雨乍晴山色淺深隨夕照  
江流日夜變秋聲上方鐘磬疎林滿十里笙歌畫舫明  
空負黃花羞短鬢寒衣三澣客心驚

詩 五言絕句

揚州懷古

唐 李 益 君虞姑藏

故國歌鐘地長橋車馬塵彭城閣邊柳偏似不勝春

揚州早鴈

江上三千鴈年年過故宮可憐江上月偏照斷根蓬

揚州寄諸子

裴夸直 禮卿河東

十里隔烟波孤舟宿何處遙思耿不眠淮南夜風雨

楊子途中

柳談 中庸京兆

楚塞望蒼然寒林古戍邊秋風人渡水落日鴈飛天

揚州廣城店

明張以寧 志道古田

潮落邗江夜先將夢到家揚州無賴月獨自照瓊花

和冒辟疆揚州燈船曲

徐穎 巢友

江都縣志

卷十九 藝文志

五十

縷金籠蠟焰剪雪作花篝廿四橋邊酒非關明月留

荷風吹月香星河忽搖動水變隴頭聲曲愛江頭弄

茱萸灣懷家兄

國朝王士徵

雨歇茱萸灣返照村墟夕淮水去悠悠何處還山客

詩 七言絕句

揚州尋張籍不見

唐王建 仲初穎川

別後知君在楚城揚州寺裏覓君名西江水潤吳山遠

却打船頭向北行

夜看揚州市

夜市千燈照碧雲高樓紅袖客紛紛如今不似承平日

猶目笙歌徹曉聞

瓜洲驛重送梁郎中楚吉州

劉長卿

河文房間

渺渺雲山去幾重  
依依獨聽廣陵鐘  
明朝借問南來客  
五馬雙旌何處逢

廣陵秋夜對月卽事

陳羽

江東

霜落寒空月上樓  
月中歌吹滿揚州  
相看醉舞倡樓月  
不覺隋家陵

秋

九日廣陵登高懷鄒二先輩

歐陽詹

簪萸泛菊俯平  
飲過三  
却憫然十幾此辰同醉友  
登高各  
已二年

江都縣志

卷十九

藝文志

五十一

陵宴次戲簡

高駢

千里

一曲狂歌酒百分  
出月爭新將軍醉罷無餘事  
把花枝折贈人

瓜洲夜泊

高蟾

河朔

偶爲芳草無情客  
是青山有本身  
一夕孤洲渡頭宿  
天風吹畫廣陵塵

宿揚州

宋蔡襄

瓜洲堰埭阻行撓  
更等江頭後信潮  
獨背殘燈數歸路  
風傳寒柝夜迢迢

登揚州北門

梅堯臣

樓上山如澹墨畫城中水似輕藍按揚州今似刀州景  
似聽中和樂職歌

入瓜步望揚州

王安石

落日平林一水邊蕪城掩映祇蒼然白頭追想當年事  
幕府青衫最少年

廣陵早春

黃庭堅  
魯直 豫章

春風十里珠簾捲髣髴三生杜牧之紅業梢頭初蠶栗  
揚州風動鬢成絲

往歲過廣陵值早春嘗作詩今春有自淮南來

者道揚州事戲以前韻寄王定國

江都縣志

卷十九 藝文志

五十二

淮南二十四橋月馬上時時夢見之想得揚州醉年少  
正園紅袖寫烏絲

廣陵道中寒食日

呂本中

風雨屬連春事休碧鱗三尺薦行舟短牆不見桃花面  
付與長江自在流

南來消息不真傳政恐相逢却未然何處青帘足沽酒  
粥香錫白是今年

發邵伯埭二首

柳外鶉鳩相應鳴屋頭新月半輪生知公未便爲官去  
且放扁舟自在行

曉日烘窓不得眠  
夾河高柳亂鳴蟬  
西風種種人愁思  
更有長亭十里船

還自廣陵四首

秦觀

薄茶便當烏程酒  
短艇聊充下澤車  
墳墓去家無百里  
往來仍不廢觀書

南北悠悠三十年  
謝公遺埭故依然  
欲論舊事無人共  
卧聽鐘魚古寺邊

邗溝繚繞上雲空  
坐阻層冰不得通  
賴有東風可人意  
爲開明鏡玉奩中

天寒水鳥白相依  
十百爲羣戲落暉  
過盡行人都不起

江都縣志

卷十九

藝文志

五十三

忽聞水響一齊飛

出城三首

視邵伯埭新堤

晁無咎

桃欲呈紅柳弄陰  
麥田青已沒鞦韆  
深春堤細雨籃輿濕  
婆餅焦聲在竹林

故國龍舟休水調  
高城雉堞尙雲間  
蜀岡朝雨如輕霧  
不見春江草外山

堆案文書無了畢  
竝堤舩舫且縈回  
非關董役年年事  
自爲春郊得得來

揚州雜詠

舩商不入古鹽溝  
疏鑿纔爭土一抔  
未說興圩灌田事

且還歌吹舊揚州

雷陂新作麥田荒曾說風興沒兩郎誰似當年李刺史  
春波還引句城塘

欲穿九曲通淮子只費春夫數日工但見荷花三十里  
何須更有大雷宮

蜀岡茶味圖經說不貢春芽向十年未惜青青藏馬鬣  
可能辜負大明泉

維揚卽事

張蘊

牛斗星邊禹貢州東南屏蔽大江流向來明月珠簾夢  
不信秋風夜析愁

江都縣志

卷十九 藝文志

五十四

皂角林前野地寬新塘路口草泥乾天乎如此功名事  
成敗觀人自昔難

月明城上韻邊笳一枕三更夢到家不耐楚氛真僻性  
賦詩酌酒與瓊花

離維揚

宋伯仁

不爲鱸魚憶故鄉只緣心事近重陽鬢絲添得三分白  
空被黃花笑一場

揚州

羅公升 滄洲

瓊姬羽化歸天去花后香銷掃地空要覓揚州舊風物  
夕陽禪智立秋風

至揚州

文天祥  
文吉

北廟何神二十郎問郎行客忒郎當荒堦枕藉無人問  
風露滿堂清夜長

樵夫偏念客途長肯向城中爲裹糧曉指高沙移處泊  
司徒廟下賈家莊

楊子

郝經  
仲常燕山

楊子江邊不見江江聲隨雨入寒牕憑誰載酒尋蘇二  
赤壁磯頭白鳥雙

離揚州

元范梈  
亨父清江

孤篷如磨遶汀沙葉滿平湖藕未花回首竹西亭漸遠

江都縣志

卷十九  
藝文志

五十五

一江煙雨酒旗斜

維揚春暮

白雲上人英  
實存錢塘

煙籠柳影老鸞啼雨濕芹香乳燕飛二十四橋春又盡

江南詞客正思歸

揚州客舍

余闕  
廷心武戚

船頭澆酒祀神龍手擲金錢撒水中百尺樓船雙夾櫓  
唱歌齊上呂梁洪

揚州

吳師道  
正傳蘭谿

畫鼓清簫估客舟朱竿翠幔酒家樓城西高屋如鱗起  
依舊淮南第一州

揚州長橋

蘇大年

綠陰高樹映清潭一舸夸猶酒半酣最愛西城城下路  
長橋煙雨似江南

揚州逢李十二衍

明袁凱

與子相逢俱少年東吳城郭酒如川如今白髮知多少  
風雨揚州共被眠

最憶東家水調聲花前檀板雜流鶯此時我醉君猶醒  
舞到梧桐白露生

揚州僧舍見花有感

徐賁幼文長洲

風遞穠香到水涯幾株桃李映門斜侯家園圃多荒廢

江都縣志

卷十九藝文志

五十六

不是僧房不見花

揚州

王禕子充金華

春滿揚州廿四橋何人騎鶴聽吹簫瓊花芍藥猶閑事  
且訪平山舊柳條

揚州二色句

程本立吳隱桐鄉

遠水踈星影動搖西風落木景蕭條傷心一片船頭月  
猶照揚州廿四橋

揚州城下是官河春雨春風自綠波欲問繁華舊時事  
太平遺老已無多

過揚州

孫蕢



江上垂楊覆白蘋斜陽啼鳥斷吟魂朱樓翠箔今何在  
一帶寒城鎖暮雲

隋堤懷古

沈章  
宗玉嘉興

邗溝新碧晚濤平楊柳曾遮殿脚行誰道雷塘歌吹歇  
月明重按玉簫聲

瓜洲渡江

吳與弼  
子傳崇仁

壩上停篙轉柁樓江邊解纜別眞州滿懷秋思無心寫  
獨看岷峨萬古流

廣陵夜泊

顧亮  
寅仲長洲

風風雨雨暗江津愁裏青燈照一身夜半忽聞江上櫓

江都縣志

卷十九  
藝文志

五十七

往來還有未歸人

廣陵春游曲

國朝  
王士禛  
西樵新城

紅樓空復玉人簫舊跡銷沉廿四橋殘醉臨風獨怙悵  
遠春無際水迢迢

寶城北是上雷塘細草青青墓跡荒莫笑錦帆隋煬帝  
李花楊葉兩茫茫

冶春絕句

同林茂之前輩杜于皇孫豹人張祖望程穆倩孫無言許力臣師六修襍裝橋

酒間賦  
台春詩

王士禛

今年東風太狡獪弄晴作雨遣春來江梅一夜落紅雪  
便有天桃無數開

野外

人穠華簇簇照青春一株低亞隋皇墓

且可當葢酒入脣

紅橋飛跨水當中一字闌干九曲紅日午畫船橋下過  
衣杳人影太匆匆

三月韶光畫不成尋春步履可憐生青蕪不見隋宮殿  
一種垂楊萬古情

髯公三過平山下白髮門生感故知欲覓醉翁呼不起  
碧虛樓閣草離離

東風花事到江城早有人家喚賣餠他日相思忘不得  
平山堂下五清明

江都縣志

卷十九

藝文志

五十八

坐上同矜作達名留犁風動酒鱗生江南無限青山好  
便與諸君荷鍤行

和王阮亭揚州治春絕句

陳維崧

其年  
宜興

一帶蕪城織野烟三春沙渚亂寒田傷心錯到平山路  
不獨江南事可憐

文選樓空畫壁虛行人弔古日躊躇六朝流水千春夢  
多事官家好著書

廣陵竹枝詞

李國宋

大付  
興

吳溝遙接汴河開江上春潮日日迴夜半槳聲聽不住  
南船纔過北船來

蕪城墩下唱歌來  
舴艋輕舸暗檣催  
家在茱萸灣裏住  
五更月落打魚回  
鬢子三山高又低  
廣陵城下水東西  
紅橋落日人爭渡  
莎草茸茸襯馬蹄

廣陵秋詞

王熹儒  
歙州興化

劫火摧殘事已遙  
至今明月憶吹簫  
秋來夜夜霜如霰  
白草寒烟廿四橋  
驚沙獵獵起秋風  
蜀道蒼茫萬里通  
射落雲中兩飛鴈  
桃花馬上整雕弓

詩餘

江都縣志

卷十九 藝文志

五十九

河傳 第六體

唐 韋 莊

何處烟雨隋堤春  
暮柳色葱蘢畫  
曉金縷翠旗高  
颭香風水光融  
青蛾殿脚春粧媚  
輕雲裏綽約司花妓  
江都宮闕清淮月  
映迷樓古今愁

柳含烟 第二體

五代 毛文錫

隋堤柳汴河春  
夾岸綠陰千里  
龍舟鳳舸木蘭香  
錦帆張 因夢江南  
春景好 一路流蘇  
羽葆笙歌未盡起  
橫流鎖春愁

浣溪沙 揚州賞芍藥櫻桃

宋 蘇 軾

芍藥櫻桃兩鬪新  
名園高會 芳辰洛陽  
初夏廣陵春

紅玉半開菩薩面丹砂穠點柳枝脣尊前還有箇中人

虞美人

與秦少游  
維揚飲別

波聲拍枕長淮曉隙月窺人小無情汴水自東流只載  
一船離恨向西州竹溪花浦曾同醉酒味多於淚誰  
教風鑑在塵埃醞造一場煩惱送人來

臨江仙

夜到揚州  
席上作

尊酒何人懷李白草堂遙指江東珠簾十里捲香風花  
開花又謝離恨幾千重輕舸渡江連夜到一時驚笑  
衰容語音猶自帶吳儂夜闌相對處依舊夢魂中

江都縣志

卷十九 藝文志

六十

夢揚州

本意

秦

歡少游

晚雲收正柳塘烟雨初休燕子未歸惻惻輕寒如秋小  
欄外東風軟透繡幃花密香稠江南遠人何處鷓鴣啼  
破春愁長記曾陪燕遊酬妙舞清歌麗錦纏頭帶酒  
困花十載因誰淹留醉鞭拂面歸來晚望翠樓簾捲金  
鈎佳會阻離情正亂頻夢揚州

望海潮

廣陵  
懷古

星分牛斗疆連淮海揚州萬井提封花發路香鶯啼人  
起珠簾十里春風豪俊氣如虹曳照春金紫飛蓋  
巷入垂楊畫橋南北翠烟中追思故國繁雄有迷樓

挂斗月觀橫空紋錦製帆明珠濺雨寧論雀馬魚龍往  
事逐孤鴻但亂雲流水縈帶離宮最好揮毫萬字一飲  
拚千鍾

水調歌頭

舟次揚州和楊濟翁周顯先韻

辛棄疾

幼安歷城

落日塞塵起邊馬獵清秋漢家組練十萬列艦聳層樓  
誰道投鞭飛渡憶昔鳴鏑血污風雨佛狸愁季子正年  
少匹馬黑貂裘今老矣搔白首過揚州倦游欲去江  
上手種橘千頭二客東南名勝萬卷詩書事業嘗試與  
君謀莫射南山虎直覓富民侯

沁園春

維揚作

劉克莊

江都縣志

卷十九

藝文志

六十一

遼鶴重來不見繁華只見凋殘甚都無人誦何郎語句  
也無人報書記平安閭里俱非江山畧是縱有高樓莫  
倚闌沉吟處但螢飛草際鴈起蘆間不辭露宿風餐  
怕萬里歸來雙鬢斑算這邊贏得黑貂裘弊那邊輸了  
翡翠衾寒檄草流傳吟牋倚閣開到瓊花亦懶看君記  
取向中州差樂塞地無歡

太平時

賀鑄

秋盡江南葉未凋晚雲高青山隱隱水迢迢接亭臯  
二十四橋明月夜弭蘭橈玉人何處教唉簫可憐宵

朝中措

維揚感懷

曾

覲

純夫

作

雕車南陌碾香塵一夢尙如新回首舊遊何仟柳烟花  
霧述春 如今霜鬢愁停短棹懶傍清樽二十四橋風  
月尋思只有消魂

菩薩蠻

廣陵盛事

蔡

伸

仲道  
莆田

水光山影浮空碧柳絲搖曳春無力柳岸繫行舟吹簫  
憶舊遊 舊遊堪更憶望斷迷南北千古恨悠悠長江  
空自流

踏莎行

與莫兩山談  
邗城舊事

周

密

草牕  
弁陽

遠草情鍾孤花韵勝一樓聳翠生秋暝十年二十四橋  
春轉頭明月簫聲冷 賦藥才高題瓊語俊蒸香壓酒

江都縣志

卷十九

藝文志

六十二

芙蓉頂景留人去怕思量桂牕風露秋眠醒

八聲甘州

竹西  
懷古

趙希邁

寒雲飛萬里一番秋一番攬離懷向隋堤躍馬前時柳  
色今度蒿萊錦纜殘香在否枉被白鷗猜千古揚州夢  
一覺庭槐 歌吹竹西難問拚菊邊醉着吟寄天涯任  
紅樓踪跡茅屋染蒼苔幾傷心橋東片月趁夜潮流恨  
入秦淮潮回處引西風恨又渡江來

風入松

廣陵元夜  
病中有感

元

張

翥

東風巷陌暮寒驕燈火鬧河橋勝遊憶徧錢塘夜青鸞  
遠信斷難招蕙草情隨雪盡梨花夢與雲銷 客懷先

目病無聊綠酒負金焦下帷獨擁香篝睡春城外玉漏  
聲遙可惜滿街明月更無人爲吹簫

菩薩蠻

除夕阮亭廣  
陵署中守歲

國朝

彭孫適

羨門

時序關心殘臘盡同雲劈雨寒猶緊小暖逼爐烟江春  
入舊年 芳柑傳綺席好事過除夕香雪動園梅春回  
人未回

望江南

廣陵早  
秋客懷

彭桂

江都恨舊事說隋朝錦纜紅穿花殿脚羅裙綠剪柳宮  
腰齊上月明橋 今荒塚塵土鈿香銷螢苑風涼山火  
細龍舟潮落弩臺高不見杏娘簫

江都縣志

卷十九 藝文志

六十三

家鄉迴極目暮雲高葵扇桃笙秋好院銀雲玉雨客清  
宵離緒柳千條 擗痛飲十斛醉葡萄少女風從前浦  
度美人虹向隔江消殘月夢紅橋

論曰江都文藝蓋發源於漢而史稱吳招致賓客  
枚乘鄒陽嚴夫子之徒興於文景之間乃實爲西  
京濫觴焉旣而董相來遊都人士益知經學其見  
於漢魏晉書如劉瑜張紘劉頌華譚戴邈高嵩諸  
人賡續遺韵雖傳者無多已爛然爲史策光矣南  
北朝而後作者寔繁唐宋之世遂號極盛而地爲  
都會四方遊宦復多撰著由元明到今則盡張壯

武之車固不足以載之今志於各條下既掇一  
以類相附其他名篇或無所附著爲四方傳誦又  
信有關於風教者別爲藝文志之然亦百存二三  
未能該載則以限於體例勢不容多故也嗟乎古  
今代嬗恃有文章帙中所具正復無幾而按其姓  
氏強半皆名世偉人展玩之下其亦足令人感發  
而興起歟

江都縣志卷之十九終

江都縣志

卷十九 藝文志

六十四